

## 歸家憶郎（唐健垣唱）

…  
…

### 【地水無限序】

心切苦，淚悲淒。叫聲君你今有誰攜。  
我自怨自嗟時運滯，怨我父係欺貧，逼我回歸。  
我問聲爹你逼我回家，叫我怎一世，我哋官門子弟唔通要再續羅幃。【中腔】

### 【地水無限序】

【正線、稍快】惟有正聲喊到聲大細，嗰啲悲情慘酷驚動內底。  
適值親娘在廳底，佢喊到我哋心肝女點解喊悲啼。  
等我暫且步入房一睇，夫人移步入到裏底。  
佢入房間一句乖女，因何比我聽到你悲啼？  
自係你父女重逢歸故里，做乜鏡台花粉你總唔施？  
自係途中失散娘和女，為娘終日為女悲啼。  
今日幸得重逢估話安樂晒，點想你反為流淚日日苦加悲。  
我亦頗知父逼女個一段姻緣事，咁你從頭對我剖白睇你父點樣逼女返嚟。  
女呀，佢話你私通定約，有個詳和細，你重頭一一講晒娘知。  
自有為娘為女你擔干紀，共你爭返啖氣，斷無任得你爹無道理，  
女呀你快快把因由一切就講白出嚟。  
【乙反、吊慢】嬌下跪，訴情衷。幸得蒼天憐憫今日母女重逢。  
皆因逃難我哋遭兵湧，女共娘親失散各西東。  
嗰陣我隻影孤單在山頭愁萬種，誰料煙塵四合四路起豪雄。【中腔】

### 【地水無限序】

我又腳細心荒難走動，我出於無奈隱在林中。  
我估話賊兵散後有娘尋到，誰料有一位秀才沿途喚妹佢芳名與女有一字相同。  
我錯應幾聲君子又尋到，邂逅相逢事化空。  
【中板】隨後強徒蜂咁湧，佢為尋親妹就要別女嬌容。  
我一再將佢阻攔請佢帶我同上路，令我寸心撩亂淚眼矇矓。【地水腔】

### 【地水無限序】

我設身此地唔知如何好？無奈我就懇求君子佢帶我去尋蹤。  
君佢屢屢相推佢話難與共，佢話孤男寡女路上難同。【地水腔】

### 【地水無限序】

佢屢屢催問我計將何安出。最怕賊兵一到慘過葉隨風。  
嗰陣我再求君子共，想話認作兄妹同行又怕鄉音不同。

我見佢為人忠厚穩重，我提議認為夫婦把關衝。  
佢見我梨花帶雨似係飄零燕，你話教人怎忍話不相從。【地水腔】

【地水無限序】

登山涉水徒勞佢，後來暫投客店把身容。  
幸得店主娘係情意重，把我夫妻一對憐憫在店房中。  
重有其中不用講娘心曉，君係蔣姓鴻門表字世隆。【地水腔】

【地水無限序】

誰料經霜歷雨君成病，正在調治表寸衷。  
佢病在店房仍未癒，偶遇爹爹來見就話我哋私通。  
佢立即要逼我拆開鸞與鳳，使我心傷痛，使我歸家愁萬種，我思君情山重，  
娘呀，我哋生不同衾死後要穴相同。【地水腔】

【地水無限序】

…  
…